



## O Parlamento de Galicia convoca a V edición do seu Concurso Escolar baixo o lema “En busca da Igualdade”

- Con esta iniciativa perséguese un maior coñecemento da institución parlamentaria entre a poboación escolar, ao tempo que se procuran actitudes e valores que estimulen a igualdade, a solidariedade e o respecto
- Fíxanse tres niveis de participación –educación infantil e educación especial, educación primaria e educación secundaria- e a preinscrición opcional está aberta ata o 19 de xaneiro, aínda que o prazo de entrega non remata ata o 30 de abril de 2015

**Santiago, 14 de decembro de 2014.-** O Parlamento de Galicia acaba de convocar a V Edición do seu Concurso Escolar, que nesta edición terá como lema “En busca da Igualdade”, co que pretende incentivar entre os escolares galegos actitudes e valores de igualdade, de solidariedade e de respecto mútuos.

As bases deste concurso pódense consultar na web do Parlamento de Galicia (<http://www.parlamento.gal/sitios/web/contenidogal/documentosdeinterese/ConcursoEscolar.aspx>) e nel poderá participar todo o alumnado escolarizado en educación infantil e educación especial, educación primaria e educación secundaria.

A convocatoria estrutúrase en tres modalidades diferentes: educación infantil e especial, educación primaria e educación secundaria. Os traballos deberán versar sobre aspectos relacionados coa Igualdade e cada un deles deberá ser elaborado, obrigatoriamente, por un grupo de catro alumnos, esixencia orientada a incentivar o traballo en equipo. Cada clase só poderá presentar a concurso un traballo e cada centro educativo poderá participar cun máximo de cinco traballos por cada unha das etapas educativas ás que se dirixe a convocatoria.



Cada grupo poderá elixir a técnica de expresión creativa que desexe: deseño dunha camiseta, relato curso, fotografías, vídeo ou vídeo xogo.

## **Premios**

As bases da convocatoria determinan que se concederá un primeiro premio por cada un dos grupos gañadores nos tres niveis educativos, con independencia da técnica empregada (unha táboa dixital e un lote de libros para cada alumno ou alumna); e un segundo premio para cada un dos grupos que quede en segundo lugar (MP5 e un lote de libros para cada un dos alumnos e alumnas).

As clases dos grupos gañadores recibirán como premio unha excursión de carácter educativo para visitar un lugar significativo de Galicia. E cada profesor ou profesora que supervisaron os traballos gañadores serán galardoados cunha táboa dixital, mentres que os docentes que supervisaran os traballos finalistas recibirán un MP5 e un lote de libros.

Os centros educativos dos grupos gañadores recibirán un premio de 2.000 euros que deberán destinar á organización de actividades extraescolares ou actividades da biblioteca escolar.

## **Xurado**

O xurado encargado de elixir aos gañadores e finalistas en cada unha das modalidades estará composto polos membros da Mesa do Parlamento de Galicia ou polos deputados e deputadas nos que estes deleguen, e por un ou unha docente proposto polo Parlamento de Galicia.

O xurado deberá valorar entre os traballos presentados os seguintes criterios: imaxinación, creatividade e orixinalidade; grao de dificultade; e a correcta e clara transmisión da mensaxe.

Saúdos, Gabinete de Comunicación do Parlamento de Galicia.

Departamento de Prensa: Gabinete da Presidencia do Parlamento de Galicia  
Tel. 981 551 329 – Fax.: 981 551 400; e-mail: carlos.varela.castineiras@parlamentodegalicia.es